

So holofernes truncken wart
Verlor den kopff er / zü dem bart /
Thamyris riecht zü spiß vnd tranck
So sie den künig Cyrum zwang /
Durch wyn lag nyder Bennedab /
So er verlor noch all sin hab /
All ere vnd tugent gar vergaß
Alexander / wann er truncken was /
Vnd dett gar oft in trunckenheit
Das im wart selber darnoch leit /
Der richman tranck als eyn gesell
Vnd aß des morndes inn der hell /
Der mensch wer fry / keyn knecht gesin
Wann drunckenheit nit wer / vnd wyn /
Wer wyns vnd feißt dings kysset sich
Der wurt nit selig oder rich /
Dem we vnd synem vatter we
Dem wurt krieg / vnd vil vnglucks me
Wer städts sich fullet wie eyn kü
Vnd will eym yeden drincken zü
Vnd wartten / als das man im bringt /
Dann wer on not vil wyns vstrinck
Dem ist gleich / als der vff dem mer
Entschlofft / vnd lyt on synn / vnd wer
Als dünt die vff den prass hant acht
Schlëmen vnd demmen / tag vnd nacht
Den dreit der wirt noch kuntschafft zü
Eyn büg vnd viertel von eynr kü
Vnd bringt inn mandel / figen / ris /
So bzalen sie in vff dem yß

